

REGLUGERÐ

um verkefni og starfshætti stjórnarnefndar og um verkefni Framkvæmdasjóðs fatlaðra.

I. KAFLI

Verkefni og starfshættir stjórnarnefndar.

Samræming og stefnumörkun.

1. gr.

Stjórnarnefnd skal samræma aðgerðir þeirra þriggja ráðuneyta, er fara með málefni fatlaðra, þ.e. félagsmálaráðuneytis, heilbrigðis- og tryggingamálaráðuneytis og menntamálaráðuneytis.

2. gr.

Stjórnarnefnd leggur fyrir ráðuneytin tillögur sínar að samræmdri stefnu í málefnum fatlaðra, sem taka mið af 1. gr. laga um málefni fatlaðra og þeim markmiðum sem þar eru sett fram.

Stjórnarnefnd leitar eftir staðfestingu á tillögum sínum frá ráðuneytum.

3. gr.

Til að uppfylla skyldur sínar á vettvangi samræmingar og tillögugerðar um stefnumörkun, sbr. 1. og 2. gr., skal stjórnarnefnd:

1. Fjalla um 3ja ára áætlanir frá svæðisstjórnnum og áætlanir ráðuneytanna, sbr. 2. og 3. mgr. 38. gr. laga um málefni fatlaðra, svo og um umsagnir ráðuneytanna um tillögur svæðisstjórna.
2. Beita sér fyrir því, í samráði við ráðuneytin, að gerðar séu nauðsynlegar kannanir í þágu áætlunargerða og stefnumörkunar. Þess skal gætt að stjórnarnefnd berist ávallt upplýsingar um kannanir á málefnum fatlaðra á vegum hinna einstöku ráðuneyta.
3. Leitast við að heimsækja hvert svæði a.m.k. einu sinni á skipunartíma.

4. gr.

Að fengnum áætlunum svæðisstjórna og ráðuneyta samhæfir stjórnarnefnd áætlanir þeirra og vinnur framkvæmdaáætlun til þriggja ára um uppbyggingu þjónustunnar í samræmi við rökstudda þörf og fjárveitingar hverju sinni. Framkvæmdaáætlunin skal unnin í samráði við félagsmálaráðuneytið. Áætlunin skal lögð fyrir viðkomandi ráðuneyti til samþykktar.

Framkvæmdaáætlanir skulu lagðar fyrir fjárlaga- og hagsýslustofnun og fjárveitingarnefnd Alþingis til upplýsinga og kynningar svo og sendar svæðisstjórnnum.

Tillögur um ráðstöfun fjár Framkvæmdasjóðs fatlaðra.

5. gr.

Stjórnarnefnd gerir tillögur til hlutaðeigandi ráðherra um árlega úthlutun úr Framkvæmdasjóði fatlaðra til stofnkostnaðar, enda hafi stjórnarnefnd áður borist tillögur ráðuneyta, sbr. 3. gr. Tillögur stjórnarnefndar skulu vera innan ramma 3ja ára framkvæmdaáætlunar, sbr. 4. gr., og árlegs ráðstöfunarfjár sjóðsins.

6. gr.

Umsóknir um framlög úr Framkvæmdasjóði fatlaðra skulu berast stjórnarnefnd í síðasta lagi í september ár hvert.

7. gr.

Að fengnum umsóknum, sbr. 6. gr., skal stjórnarnefnd hefja undirbúningsvinnu að tillögugerð um úthlutun.

Tekið skal sérstakt tillit til fjölda einstaklinga á hverju svæði og þeirrar þjónustu er þeir þarfnast.

Endanlegar tillögur að úthlutun verði lagðar fyrir viðkomandi ráðherra eigi síðar en í lok janúar ár hvert. Eftir staðfestingu ráðherra skal stjórnarnefnd senda úthlutunina fjárlaga- og hagsýslustofnun og fjárveitinganefnd Alþingis til kynningar.

8. gr.

Skilyrði fyrir úthlutun til framkvæmda á vegum opinberra aðila úr Framkvæmdasjóði fatlaðra er að fyrir liggi frumathugun, sbr. 3. gr. laga um skipan opinberra framkvæmda og áætlanagerð, sbr. 7. gr. sömu laga.

Kostnaðaráætlanir skulu miðaðar við byggingarvísitölu í septembermánuði. Framreikna skal kostnaðaráætlanir til áætlaðrar meðalvísitölu (byggingarvísitölu) úthlutunarársins. Stjórnarnefnd ber að taka mið af kostnaðaráætlunum þannig framreiknuðum.

9. gr.

Framlög til stofnkostnaðarframkvæmda til byggingar eða kaupa á húsnaði, sem rekið skal skv. 7. gr. laga um málefni fatlaðra, skulu ekki greidd út fyrr en fyrir liggi starfs- og rekstrarleyfi þegar stofnanir sveitarfélaga, félaga fatlaðra eða sjálfseignarstofnanir eiga í hlut. Sama á við um stofnanir sem reknar eru af svæðisstjórnnum.

10. gr.

Þeim aðilum, er fá úthlutað fé úr Framkvæmdasjóði fatlaðra, skal gerð skriflega grein fyrir úthlutun og til hvaða verkefna hún nær.

Eigi síðar en ári eftir úthlutun skal sá aðili, er úthlutun hlaut, senda stjórnarnefnd sundurliðað uppgjör um ráðstöfun fjárens.

Eigi verði úthlutað á ný til aðila nema uppgjör, sbr. 2. mgr., hafi áður borist stjórnarnefnd.

11. gr.

Um greiðslu stofnkostnaðar, eftirlit með úthlutuðu fé úr Framkvæmdasjóði fatlaðra og eftirlit með framkvæmdum, fer að öðru leyti eftir IV. kafla reglugerðar nr. 328/1986 og lögum um skipan opinberra framkvæmda nr. 63/1970.

Úrlausn ágreiningsmála.

12. gr.

Komi upp ágreiningur um framkvæmd laga um málefni fatlaðra, skal skjóta þeim ágreiningi til stjórnarnefndar.

Stjórnarnefnd skal leita sátta í málinu.

Takist sættir ekki, skal stjórnarnefnd skera úr um málið. Fylgt skal þeirri meginreglu að aðilar eigi rétt á að kynna sér gögn málsins. Einnig skulu aðilar eiga þess kost að tjá sig um ágreiningsefni.

Gengið skal til formlegrar atkvæðagreiðslu í stjórnarnefnd um málsúrslit.

Þeir aðilar, sem hlut eiga að máli, geta skotið ákvörðun stjórnarnefndar til viðkomandi ráðherra.

Önnur atriði.

13. gr.

Um önnur verkefni stjórnarnefndar svo sem stjórn Greiningar- og ráðgjafastöðvar fer eftir lögum nr. 41/1983 um málefni fatlaðra.

II. KAFLI

Verkefni Framkvæmdasjóðs fatlaðra.

14. gr.

Hlutverk Framkvæmdasjóðs fatlaðra er að fjármagna stofnkostnað vegna þeirra stofnana er greindar eru í 2.–14. tölul. 7. gr. laga um málefni fatlaðra nr. 41/1983, sbr. 26. gr., sbr. 1. gr. laga nr. 87/1989, og 27. gr. sömu laga.

Skilyrði fjármögnunar eru:

1. Viðkomandi stofnanir séu ætlaðar fötluðum, ekki sé um að ræða almennar stofnanir, sjá 3. og 4. mgr. 6. gr. laga um málefni fatlaðra.
2. Fjármögnun viðkomandi stofnana sé ekki ákveðin með öðrum hætti, lögum samkvæmt. Auk verkefna, sbr. lið nr. 1 og 2, er Framkvæmdasjóði heimilt að verja fé til verkefna skv. 17. og 18. gr. reglugerðar þessarar.

15. gr.

Framkvæmdasjóður skal standa undir stofnkostnaði þegar eftirtaldar stofnanir, sbr. 7. gr. laga nr. 41/1983, á vegum ríkisins eiga í hlut enda sé fullnægt skilyrðum 14. gr.:

Göngudeildir, þar sem jafnframt skal veita eftirvernd.
Skammtímafósturheimili.
Leikfangasöfn.
Meðferðarheimili.
Sumardvalarheimili.
Sambýli.

Dagvistarstofnanir fatlaðra.
Hjúkrunarheimili.
Verndaðir vinnustaðir.
Atvinnuleit.
Hæfingar- og endurhæfingarstöðvar.
Vistheimili.

16. gr.

Framkvæmdasjóði er heimilt að veita styrk eða lán til félaga fatlaðra ef þau koma á fót eftirfarandi stofnunum samkvæmt 3.–10. tölul. og 12.–14. tölul. 7. gr. laga nr. 41/1983, enda sé fullnægt skilyrðum 14. gr. reglugerðar þessarar:

Skammtímafósturheimilum.
Leikfangasöfnum.
Meðferðarheimilum.
Sumardvalarheimilum.
Sambýlum.
Dagvistarstofnunum fatlaðra.

Hjúkrunarheimilum.
Vernduðum vinnustöðum.
Hæfingar- og endurhæfingarstöðvum.
Vistheimilum.
Skóladagheimilum.

17. gr.

Heimilt er að veita styrk úr Framkvæmdasjóði til að stækka verndaða vinnustaði og bæta tækjabúnað, sem miðar að aukinni og hagkvæmari starfsemi þeirra, hvort sem þeir eru á vegum svæðisstjórna, sveitarfélaga eða félaga fatlaðra.

Einnig er heimilt að veita fé úr sjóðnum til að breyta almennum vinnustöðum og bæta tækjabúnað, sem tryggt geti fötluðum vinnu á almennum vinnumarkaði, enda mæli svæðisstjórn og atvinnuleitin með breytingum.

18. gr.

Auk þeirra verkefna er tilgreind eru í 15.–17. gr., er Framkvæmdasjóði heimilt að verja allt að 10% af ráðstöfunarfé sjóðsins til annarra sameiginlegra verkefna varðandi sérkennslu og endurhæfingu, svo og annarra verkefna, sem ríki eða sveitarfélögum ber sannanlega ekki að greiða, þ. á m. fyrirgreiðslu vegna framleiðslustarfsemi fatlaðra í heimahúsum, sbr. 2. lið 19. gr. laga um málefni fatlaðra.

19. gr.

Reglugerð þessi, sem sett er með heimild í 43. gr. laga nr. 41/1983 um málefni fatlaðra, öðlast gildi þegar í stað.

Ákvæði til bráðabirgða.

Hafi, fyrir gildistöku reglugerðar þessarar, verið veitt fjármagn úr Framkvæmdasjóði fatlaðra til byggingar á sérskólum, skal Framkvæmdasjóður fjármagna byggingarframkvæmdirnar þar til þeim er lokið.

Félagsmálaráðuneytið, 9. janúar 1990.

Jóhanna Sigurðardóttir.

Margrét Margeirsdóttir.

AUGLÝSING

um staðfestingu á breytingu á áður staðfestu deiliskipulagi Molduhrauns í Garðabæ.

Samkvæmt skipulagslögum nr. 19 21. maí 1964 hefur ráðuneytið hinn 5. janúar 1990 staðfest breytingu á áður staðfestu deiliskipulagi Molduhrauns í Garðabæ þann 14. janúar 1988. Breytingin er fólgin í því að leyfileg hámarkshæð húss á lóðinni nr. 7. við Vesturhraun, sem framvegis mun heita nr. 4 við Suðurhraun verður 14,5 metrar í stað 9,5 metrar.

Breyting þessi hefur hlotið þá meðferð sem lög nr. 19/1964 gera ráð fyrir. Bæjarstjórn Garðabæjar hefur samþykkt hana og skipulagsstjórn ríkisins hefur afgreitt hana til staðfestingar ráðuneytisins.

Félagsmálaráðuneytið, 5. janúar 1990.

F. h. r.

Berglind Ásgeirsdóttir.

Hólmfríður Snæbjörnsdóttir.